

SORMEN BEKA



OINARRIAK 2024

1. Xedea, baldintzak eta diru laguntzaren helburua
2. Sorkuntza Bekaren onuradunak
3. Sorkuntza Bekaren zenbatekoa
4. Beste diru laguntza batzuekin bateragarri
5. Eskariak nola egin: baldintzak, epea, modua eta aurkeztu beharreko dokumentazioa
6. Balorazio irizpideak
7. Epai mahaia
8. Ebazpena eta jakinarazpena
9. Diru laguntzaren ordainketa
10. Sorkuntza Bekaren onuradunaren betebeharrak
11. Sorkuntza Bekaren zuriketa
12. Itzulketak
13. Sorkuntza Bekaren lan irabazlearen zabalkundea
14. Datuen babesa
15. Oinarrien onarpena

1. Xedea, baldintzak eta diru laguntzaren helburua

Deialdi honen helburua, euskarazko kultur sorkuntzarako beka prozedura arautzea da, Durangoko Azokaren ekimenen barruan.

Beka honen helburua euskarazko sorkuntza sustatzea eta sortzaile berrien lana ezagutzera ematea da. Gerediaga Elkarateak eta Durangoko udalak euskarazko lanen zabalkundea eta sortzaile berriei bidea erraztu nahi die, Durangoko Azokaren bidea jarraituz.

2024ko deialdia, esku-hartze artistikoei zuzendutakoa izango da. Azken urteetan, Durangoko Azokak Durangoko Arte eta Historia Museoa ere

ekitaldiak antolatu ditu. Deialdi honetako sormen bekarako proposamenak museoan edo/eta museo inguruan egiteko esku-hartzeak izan beharko dira, horretarako edozein diziplina aintzat hartuta: piktorikoa, eskultorikoa, ikus-entzunezkoa, peformatiboa, e.a. Lanak, beste aldetik, "Euskara Jendea" izango du gaitzat.

Beka honek bi urrats ditu: sorkuntza lana bera eta sorkuntzaren emaitza 2025eko Durangoko Azokako egitarau barruan plazaratzea.

Lana aurkezterakoan kontuan izan:

- Jatorrizko sormen lana izan behar da.
- Hitzak barne dituen sormen lana bada, euskaraz izan behar da.
- **Lana esku-hartze artistikoa izango da edozein diziplina edo diziplina arteko uztarketatik sortutakoa: piktorikoa, eskultorikoa, ikus-entzunezkoa, performatiboa, e.a.**
- Sorkuntza lana bera eta emaitza nola plazaratuko den jaso beharko dira aurkezten den proposamenean, kontuan hartuta, Durangoko Museoa (barrua zein kanpoko ingurunea) kokaleku izango duela.
- Esku-hartze artistikorako gaia "Euskara Jendea" izango da.

2. Sorkuntza Bekaren onuradunak

Bakarkako lana edo talde lana izan daiteke. Lanen bat taldean aurkezten bada, taldeak pertsona bakarra aukeratuko du taldearen ordezkari.

Eskatzaile bakoitzak proiektu bakarra aurkez dezake.

Baldintzak:

- Eskatzaileak 18 urtetik gora eduki beharko ditu eskabidea egiterakoan.
- Eskatzailea sortzaile berria izan behar da eta euskaraz komunikatzeko gaitasuna izan behar du.
- Taldeen kasuan, talde sortu berria izan beharko da eta partaideen 2/3 sortzaile berriak izan behar dira.

Sortzaile berria zer den: aurkezten duen proposamena bere lehen edo bigarren esku-hartze artistikoa izatea (taldean egindako esku-hartzeak kanpo daude). Talde modura aurkeztu ezker, talde horren lehen edo bigarren esku-hartze artistikoa izan behar da.

- Zuzenean edo zeharka giza eskubideak urratzen dituen edozein proposamen ez da onartuko

3. Sorkuntza Bekaren zenbatekoa

Bekaren zenbatekoa honakoa izango da: 15.000 €, sorkuntza eta plazaratzea barne (produkzioa, instalazioa, e.a.)

Proiektu bakarrari emango zaio diru-laguntza eta hori lehiaketa bidez aukeratuko da. Epaimahaiak aurkeztutako proiektuen artean nahikoa kalitate ez dagoela ikusiko balu, beka ez ematea erabaki dezake.

4. Beste diru laguntza batzuekin bateragarritasuna

Gerediaga Elkarteak eta Durangoko udalak eskaintzen duten beka, helburu berarekin ematen diren beste edozein diru-laguntzekin bateragarria izango da. Onuradunak aurkeztutako beste diru-laguntzen berri eman beharko dio Gerediagari.

5. Eskariak nola egin: baldintzak, epeak eta modua eta aurkeztu beharreko dokumentazioa

Eskabidea egiteko epea deialdia egiten den egun berean hasi eta irailaren 21era arte luzatuko da. Jai eguna izanez gero, hurrengo lanegunera arte luzatuko litzateke.

Eskabideak posta elektronikoz egingo dira gerediaga@durangokoazoka.eus helbidean. Eskaria egiteko beharrezko galdetegi eta ereduak, berriz, www.durangokoazoka.eus-en helbidean izango dira.

Eskabidearekin batera aurkeztu beharreko dokumentazioa:

- Eskaera-orria (Proiektuaren izena, partaideen izenak, kontakturako informazioa).
- Eskatzailearen NANaren fotokopia (edo talde ordezkariarena).
- Proiektua originala dela ziurtatuz eta beste diru-laguntzaren bat jaso edo eskatu bada aitortza.
- Sortzailearen kurrikuluma eta taldea bada taldeko kide guztiena (kaleratutako lanen edo kolaborazioen aipamen berezia eginda).
- Proiektuaren azalpena (ezingo da eskatzailearen erreferentziarik egon hurrengo dokumentuetan):
 - Sormen lana egiteko motibazioa.

- Memoria laburra (Esku-hartzerako aukeratutako espazioa adierazi beharko da)

- Balorazioa egiteko beharrezko ikusten den beste edozein dokumentazio.

Galdetegietatik kanpo, proiektuari buruzko idazki guztiak, Times New Roman 12 pt – 1'15 lerro artekoan eginda eta PDF formatuan aurkeztu beharko dira.

Epaimahaiak komenigarri ikusiko balu, edozein informazio gehigarri eska dezake.

Eskatzaileak eginiko eskabideak akatsak balitu, horiek zuzentzeko 10 eguneko epea emango zaio, jakinarazpena bidaltzen denetik.

6. Balorazio irizpideak

Balorazioa egiteko orduan, honako irizpideak hauek hartuko dira kontuan:

- Proiektuaren kalitatea.
- Gaitasun berritzailea eta originaltasuna.
- Durangoko Museoak eskaintzen dituen espazioetara egokitzeko ahalmena
- Proiektuaren hedatze ahalmena.
- Gaia transmititzeko gaitasuna.
- Aurrez aurreko proiektuaren defentsa argudiatua.

7. Epaimahaia eta jarraipen batzordea

Epaimahaia 5 kidez osatuta egongo da:

- Gerediaga Elkartek izendatutako kide bat.
- Durangoko udalak izendatutako kide bat.
- Diziplina ezberdinetako adituak diren hiru kide.

Epaimahaiak, hala behar izanez gero, euskal kulturako beste adituren baten txosten edo iritzia eska dezake.

Jarraipen batzordea eratuko da, proiektua behar bezala garatzen dela ebaluatzeko eta bermatzeko. Egokitzapenik edo aldaketarik proposatuko balitz, batzorde horri dagokio proposamenak baimentzea.

Oinarrien interpretazioaren harira, sor daitekeen edozein zalantza, epaimahaiak argituko du. Proposamena egiterakoan edozein zalantza, idatziz bidali eta idatziz erantzungo da gerediaga@durangokoazoka.eus helbidean.

8. Ebazpena eta jakinarazpena

Bidalitako eskariak aztertu ondoren, epaimahaiak lau zapabost proiektu aukeratuko ditu. Aukeratutakoek epaimahaiaren aurrean proiektuaren defentsa egin beharko dute, eta egon daitezkeen zalantzak argitu.

Behin aurkezpenak eginda, epaimahaiak erabakia hartuko du, eta proiektua aurkeztu dutenei jakinaraziko die.

Epaimahaiak hartutako erabakiaren kontra, ez da egongo alegaziorik aurkezteko aukerarik.

Jakinarazpen prozesua sinpleago, azkarrago eta errazagoa izateko, erabakia telefonoz edo emaniko posta elektronikoan jakinaraziko zaie eskatzaileei.

Bekaren irabazlea Durangoko Azokaren egitarauaren barruan jakinaraziko da. Bekaren onuradunak Azokan eta prentsaurrekoetan parte hartzeko prest egon beharko du.

9. Sorkuntza Bekaren ordainketa

Beka 3 alditan ordainduko da: % 30a ebazpena onartzean, % 40a handik sei hilabetera, txostenaren aurkezpenarekin batera, eta azken % 30a Durangoko Azokan lana plazaratzean.

Irabazleak proiektua gauzatu ez balu, aurrerakin gisa jasotako diru-kopurua itzuli beharko dio Gerediagari.

10. Sorkuntza Bekaren onuradunaren betebeharrak

- Proiektua esandako eran eta epeetan gauzatzea.
- Diruz lagundutako jarduera burutzeko behar diren baimen guztiak eskuratzea, eta horietan ezarritakoa betetzea.
- Onuradunak bere sormen lana jendaurrean lehenengoz Durangoko Azokan aurkeztea, eta gero beste behin, Durangoko udalerrian, urtebeteko epealdian, beti ere Durangoko udal arduradunek horrela eskatuko balute.
- Lanak 2025eko abenduaren 1erako amaituta egon beharko du eta 2025eko Durangoko Azokan aurkeztuko da lehenengoz.
- Postproduzio edota lan teknikoetarako Euskal Herriko teknikariak hobetsiko dira.
- Antolatzaileek (Gerediaga eta Durangoko Udala) euren logoak ezarriko dituzte lanaren zabalkunderako euskarrietan.

11. Sorkuntza Bekaren zuriketa

Honako egiaztatze agiriak aurkeztu beharko dira bekaren zuriketa egiteko:

- Lanaren ekoizpena.
- Burututako lanaren egiaztapen eta lekuko gisa baliagarri izango den dokumentazio grafiko, argitalpen edo ikus-entzunezkoa.

12. Itzulketak

Onuradunak kontratu pribatua sinatuko du Gerediaga Elkartearekin eta jasotako diru-laguntza itzuli beharko du, ezarritako baldintzak ez baditu betetzen.

13. Lanaren zabalkundea

Deialdi honetan parte hartzeak, eskatzaileak honako zabalkunde baldintzak onartzen dituela esan nahi du:

- Gerediagak, onura gabeko asmoz, edozein formatutan (paperean edo digitalean) argitara dezake proiektuari buruzko informazioa.
- Gerediagak sormen lanen irudiak erabil ditzake, zabalkunderako webgune, sare sozial edo argitalpenetan, beti ere, bere osotasunean ez bada, eta lanaren jabetza aipatuz.

Aurkeztutako proiektuaren jabetza intelektualari buruzko erreklamaziorik egongo balitz, proiektua aurkeztu duen pertsona izango litzateke horren erantzule.

14. Datuen babesa

Europako Legebiltzarreko eta 2016-ko apirilaren 7-an Kontseiluko UE 2016/679 araudian jasotakoarekin bat Gerediaga Elkarteak jakinarazten du, Pribatutasun Politika onartuz, Sormen Bekara proposamena aurkeztuta, baimen informatua, berariazkoa, librea eta agerikoa ematen zaiola Gerediaga Elkarteari emandako datuak tratatzeko.

Datu hauei indarrean dagoen legearen segurtasun neurriak, neurri teknikoak eta antolakuntza neurriak aplikatzen zaizkie. Ez zaie daturik utziko hirugarrenei, legeak agindu ezean.

Datuen tratamendu arduraduna, Gerediaga Elkartea da. NIF zenbakia G48113153, egoitza soziala Larrasoloeta 3, 48200 Durango eta kontaktuko posta elektronikoa: gerediaga@gerediaga.eus

15. Oinarrien onarpena

Eskabidea aurkezteak esan nahi du berariaz eta formalki onartzen direla deialdi honen oinarrietan zehaztutako baldintzak.